

ւորութիւնը, Դաւիթ Արեւելցի, Եղիազար Այնթապցի, Յովհաննէս Մուղնեցի, Թովմաս Բերիացի, Մարտիրոս Ղըրմեցի և Ղազար Տիվրեկցի կամ Սեբաստացի Կ. Պոլսոյ պատրիարքներու և աշխարհական տեղակայներու պաշտօնավարութեանց շրջանները. Այնթապցիի և Մուղնեցիի ու անոնց կուսակիցներուն իւրարու դէմ ունեցած վէճերն ու հակամարտութիւնները, Թովմաս Բերիացիի եղբրական վախճանը, Երուսաղէմի Սուրբ Տեղեաց վէճերը և Սուրբ Յակոբեանց վանքի գրաւումը Յոյներէն, Եղիազարի բանտարկութիւնն ու ազատութիւնը, Սուրբ Սարգիս և Սուրբ Նիկողայոս եկեղեցիներու հրկիզումը, վերջինիս վերաշինութիւնն ու քանդումը, քանի մը նոր նահատակներու վկայաբանութիւնը, նաև ձեռնադրութիւններ, տըւչութիւններ և այլն: Օրագրութեան մէջ ոչ նուազ կարեւոր տեղ տրուած է կարգ մը ընտանեկան գէպքերու, որոնց գլխաւորներն են՝ 1649 Օգոստոս 5ին Մահտեսի Ամբակումի հետ Երեմիայի Երուսաղէմ ուխտի երթալն ու Կ. Պոլիս վերադարձը՝ 1650 Մայիս 27ին, իր ամուսնութիւնը՝ 1654 Մայիս 22ին, իր կրտսեր եղբօր Կոմիտասի ծնունդը՝ 1656 Ապրիլ 22ին, մկրտութիւնը՝ 27ին, Մահտեսի Ամբակումի մահը՝ 1658 Նոյեմբեր 3ին, իր Մաղաքիա զաւակին մկրտութիւնը՝ 1662 Մարտ 9ին ու շատ մը մկրտութեանց, հարսանեաց, յուղարկաւորութեանց, այցելութեանց և այլն յիշատակութիւններ:

Երեմիա իր Օրագրութեան մէջ մեծ տեղ տուած է 1648–1662 տարիներու քաղաքական անցքերուն, մերթ համառօտ և մերթ ընդարձակ, նկարագրելով Օսմանեան տէրութեան արտաքին պատերազմները, ներքին խռովութիւններն ու ապստամբութիւնները, պալատական դաւեր, սպանութիւններ, նախարարաց ու պաշտօնէից փոփոխութիւններ, մայրաքաղա-